

遼

史

冊三



遼史卷三十

元中書右丞相總裁脫脫等修

本紀第三十

天祚皇帝四

五年春正月辛巳党項小斛祿遣人請臨其地戊子趨天德過沙漠金兵忽至上徒步出走近侍進珠帽却之乘張仁貴馬得脫至天德己丑遇雪無禦寒具尤者以貂裘帽進途次絕糧尤者進麩與棗欲憩尤者卽跪坐倚之假寐尤者輦惟齧冰雪以濟饑過天德至夜將宿民家給曰偵騎其家知之乃叩馬首跪而大慟潛宿其家居數日嘉其忠遙授以節度使遂趨党項以小斛祿爲西南面招討使總知軍事仍賜其子及諸校爵賞有差二月至應州新城東六十里爲金人完顏婁室等所獲八月癸卯至金丙午降封海濱王以疾終年五十有四在位二十四年金皇統元年二月改封豫王五年葬于廣寧府閭陽縣乾陵傍耶律淳者世號爲北遼淳小字涅里興宗第四孫南京留守宋魏王和魯幹

之子清寧初太后鞠育之既長篤好文學昭懷太子得罪上欲以淳爲嗣上怒耶律白斯不知與淳善出淳爲彰聖等軍節度使天祚卽位進王鄭乾統二年加越王六年拜南府宰相首議制兩府禮儀上喜徙王魏其父和魯幹薨卽以淳襲父守南京冬夏入朝寵冠諸王天慶五年東征都監章奴濟鴨子河與淳子阿撒等三百餘人亡歸先遣敵里等以廢立之謀報淳淳斬敵里首以獻進封秦晉國王拜都元帥賜金券免漢拜禮不名許自擇將士乃募燕雲精兵東至錦州隊長武朝彥作亂劫淳淳匿而免收朝彥誅之會金兵至聚兵戰于阿里軫斗敗績收亡卒數千人拒之淳入朝釋其罪詔南京刻石紀功保大二天天祚入夾山奚王回離保林牙耶律大石等引唐靈武故事議欲立淳淳不從官屬勸進曰主上蒙塵中原擾攘若不立王百姓何歸宜熟計之遂卽位百官上號天錫皇帝改保大二年爲建福元年大赦放進士李寶信等一十九人遙降天祚爲湘陰王以燕雲平上京中京遼西六路淳主之沙漠以北南北路兩都招討府諸蕃部族等仍隸天祚自此遼國分矣封其妻普賢女爲德妃以回

離保知北院樞密使事軍旅之事悉委大石又遣使報宋免歲幣結好宋人發兵問罪擊敗之尋遣使奉表于金乞爲附庸事未決淳病死年六十百官僞諡曰孝章皇帝廟號宣宗葬燕西香山永安陵遺命遙立秦王定以存社稷德妃爲皇太后稱制改建福爲德興元年放進士李球等百八人時宋兵來攻戰敗之由是人心大悅兵勢日振宰相李純等潛納宋兵居民內應抱關者被殺甚衆翌日攻內東門衛兵力戰宋軍大潰踰城而走死者相籍五表于金求立秦王不從而金兵大至德妃奔天德軍見天祚天祚怒誅德妃降淳庶人除其屬籍耶律雅里者天祚皇第二子也字撒鸞七歲欲立爲皇太子別置禁衛封梁王保大三年金師圍青塚寨雅里在軍中太保特母哥挾之出走間道行至陰山聞天祚失利趨雲內雅里馳赴時扈從者千餘人多於天祚天祚慮特母哥生變欲誅之責以不能全救諸王將訊之仗劍召雅里問曰特母哥教汝何爲雅里對曰無他言迺釋之天祚渡河奔夏隊帥耶律敵烈等劫雅里北走至沙嶺見蛇橫道而過識者以爲不祥後三日羣僚共立雅里爲主雅里遂卽位

改元神歷命士庶上便宜雅里性寬大惡誅殺獲亡者笞之而已有自歸者卽官之因謂左右曰欲附來歸不附則去何須威逼耶每取唐貞觀政要及林牙資忠所作治國詩令侍從讀之烏古部節度使紇哲迭列部統軍撻不也都監突里不等各率其衆來附自是諸部繼至而雅里曰漸荒怠好擊鞠特毋哥切諫乃不復出以耶律敵烈爲樞密使特毋哥副之敵烈劾西北路招討使蕭紇里熒惑衆心志有不臣與其子麻涅並誅之以遙設爲招討使與諸蕃戰數敗杖免官從行有疲困者輒振給之直長保德諫曰今國家空虛賜賚若此將何以相給耶雅里怒曰昔畋於福山卿誣獵官今復有此言若無諸部我將何取不納初令羣牧運鹽礫倉粟而民盜之議籍以償雅里乃自爲直每粟一車償一羊三車一牛五車一馬八車一駝左右曰今一羊易粟二斗且不可得乃償一車雅里曰民有則我有若令盡償民何堪後獵查剌山一日而射黃羊四十狼二十一因致疾卒年三十耶律大石者世號爲西遼大石字重德太祖八代孫也通遼漢字善騎射登天慶五年進士第擢翰林應奉尋陞承旨遼以翰林

爲林牙故稱大石林牙歷泰祥二州刺史遼興軍節度使保大二年金兵日逼
天祚播越與諸大臣立秦晉王淳爲帝淳死立其妻蕭德妃爲太后以守燕及
金兵至蕭德妃歸天祚天祚怒誅德妃而責大石曰我在汝何敢立淳對曰陛
下以全國之勢不能一拒敵棄國遠遁使黎民塗炭卽立十淳皆太祖子孫豈
不勝乞命於他人耶上無以答賜酒食赦其罪大石不自安遂殺蕭乙薛坡里
括自立爲王率鐵騎二百宵遁北行三日過黑水見白達達詳穩牀古兒牀古
兒獻馬四百駝二十羊若干西至可敦城駐北庭都護府會威武崇德會蕃新
大林紫河駝等七州及大黃室韋敵刺王紀刺茶赤刺也喜鼻古德尼刺達刺
乖達密里密兒紀合主烏古里阻卜普速完唐古忽毋思奚的紉而畢十八部
王衆諭曰我祖宗艱難創業歷世九主歷年二百金以臣屬逼我國家殘我黎
庶屠翦我州邑使我天祚皇帝蒙塵于外日夜痛心疾首我今仗義而西欲借
力諸蕃翦我仇敵復我疆宇惟爾衆亦有軫我國家憂我社稷思共救君父濟
生民於難者乎遂得精兵萬餘置官吏立排甲具器仗明年二月甲午以青牛

白馬祭天地祖宗整旅而西先遺書回鶻王畢勒哥曰昔我太祖皇帝北征過
卜古罕城卽遣使至甘州詔爾祖烏母主曰汝思故國耶朕卽爲汝復之汝不
能返耶朕則有之在朕猶在爾也爾祖卽表謝以爲遷國于此十有餘世軍民
皆安土重遷不能復返矣是與爾國非一日之好也今我將西至大食假道爾
國其勿致疑畢勒哥得書卽迎至邸大宴三日臨行獻馬六百駝百羊三千願
質子孫爲附庸送至境外所過敵者勝之降者安之兵行萬里歸者數國獲駝
馬牛羊財物不可勝計軍勢日盛銳氣日倍至尋思于西域諸國舉兵十萬號
忽兒珊來拒戰兩軍相望二里許諭將士曰彼軍雖多而無謀攻之則首尾不
救我師必勝遣六院司大王蕭幹里刺招討副使耶律松山等將兵二千五百
攻其右樞密副使蕭剌阿不招討使耶律木薛等將兵二千五百攻其左自以
衆攻其中三軍俱進忽兒珊大敗僵屍數十里駐軍尋思于凡九十日回回國
王來降貢方物又西至起兒漫文武百官冊立大石爲帝以甲辰歲二月五日
卽位年三十八號葛兒罕復上漢尊號曰天祐皇帝改元延慶追諡祖父爲嗣

元皇帝祖母爲宣義皇后冊元妃蕭氏爲昭德皇后因謂百官曰朕與卿等行三萬里跋涉沙漠夙夜艱勤賴祖宗之福卿等之力冒登天位爾祖爾父宜加卹典共享尊榮自蕭幹里刺等四十九人祖父封爵有差延慶三年班師東歸馬行二十日得善地遂建都城號虎思幹耳朵改延慶爲康國元年三月以六院司大王蕭幹里刺爲兵馬都元帥敵刺部前同知樞密院事蕭查刺阿不副之茶赤刺部禿魯耶律燕山爲都部署護衛耶律鐵哥爲都監率七萬騎東征以青牛白馬祭天樹旗以誓于衆曰我大遼自太祖太宗艱難而成帝業其後嗣君耽樂無厭不恤國政盜賊蠡起天下土崩朕率爾衆遠至朔漠期復大業以光中興此非朕與爾世居之地申命元帥幹里刺曰今汝其往信賞必罰與士卒同甘苦擇善水草以立營量敵而進毋自取禍敗也行萬餘里無所得牛馬多死勒兵而還大石曰皇天弗順數也康國十年歿在位二十年廟號德宗子夷列年幼遺命皇后權國后名塔不煙號感天皇后稱制改元咸清在位七年子夷列卽位改元紹興籍民十八歲以上得八萬四千五百戶在位十三年

歿廟號仁宗子幼遺詔以妹普速完權國稱制改元崇福號承天太后後與駙馬蕭朶魯不第朴古只沙里通出駙馬爲東平王羅織殺之駙馬父斡里刺以兵圍其宮射殺普速完及朴古只沙里普速完在位十四年仁宗次子直魯古卽位改元天禧在位三十四年時秋出獵乃蠻王屈出律以伏兵八千擒之而據其位遂襲遼衣冠尊直魯古爲太上皇皇后爲皇太后朝夕問起居以待終焉直魯古死遼絕耶律淳在天祚之世歷王大國受賜金券贊拜不名一時恩遇無與爲比當天祚播越以都元帥留守南京獨不可奮大義以激燕民及諸大臣興勤王之師東拒金而迎天祚乎乃自取之是篡也況忍王天祚哉大石旣帝淳而王天祚矣復歸天祚天祚責以大義乃自立爲王而去之幸藉祖宗餘威遺智建號萬里之外雖寡母弱子更繼迭承幾九十年亦可謂難矣然淳與雅里大石之立皆在天祚之世有君而復君之其可乎哉諸葛武侯爲獻帝發喪而後立先主爲帝者不可同年語矣故著以爲戒云

贊曰遼起朔野兵甲之盛鼓行轍外席卷河朔樹晉楨漢何其壯歟太祖太宗

乘百戰之勢輯新造之邦英謀睿略可謂遠矣雖以世宗中才穆宗殘暴連遭弑逆而神器不搖蓋由祖宗威令猶足以震疊其國人也聖宗以來內脩政治外拓疆宇旣而申固鄰好四境乂安維持二百餘年之基有自來矣降臻天祚旣丁未運又缺人望崇信姦回自掇國本羣下離心金兵一集內難先作廢立之謀叛亡之迹相繼蠡起馴致土崩瓦解不可復支良可哀也耶律與蕭世爲甥舅義同休戚奉先挾私滅公首旤構難一至於斯天祚窮蹙始悟奉先誤己不旣晚乎淳雅里所謂名不正言不順事不成者也大石苟延彼善於此亦幾何哉

遼史卷三十

遼史卷三十一

元中書右丞相總裁脫脫等修

志第一

營衛志上

上古之世草衣木食巢居穴處熙熙于不求不爭爰自炎帝政衰蚩尤作亂始制干戈以毒天下軒轅氏作戮之涿鹿之阿處則象吻于宮行則懸旄于纛以爲天下萬世戒於是師兵營衛不得不設矣冀州以南歷洪水之變夏后始制城郭其人土著而居綏服之中外奮武衛內揆文教守在四邊營衛之設以備非常而已并營以北勁風多寒隨陽遷徙歲無寧居曠土萬里寇賊姦宄乘隙而作營衛之設以爲常然其勢然也有遼始大設制尤密居有宮衛謂之幹魯朵出有行營謂之捺鉢分鎮邊圉謂之部族有事則以攻戰爲務閒暇則以畋漁爲生無日不營無在不衛立國規模莫重於此作營衛志

宮衛

遼國之法天子踐位置宮衛分州縣析部族設官府籍戶口備兵馬崩則扈從后妃宮帳以奉陵寢有調發則丁壯從戎事老弱居守太祖曰弘義宮應天皇后曰長寧宮太宗曰永興宮世宗曰積慶宮穆宗曰延昌宮景宗曰彰愍宮承天太后曰崇德宮聖宗曰興聖宮興宗曰延慶宮道宗曰太和宮天祚曰永昌宮又孝文皇太弟有敦睦宮丞相耶律隆運有文忠王府凡州三十八縣十提轄司四十一石烈二十三瓦里七十四抹里九十八得里二間撒十九爲正戶八萬蕃漢轉戶十二萬三千共二十萬三千戶算幹魯朵太祖置國語心腹曰算宮曰幹魯朵是爲弘義宮以心腹之衛置益以渤海俘錦州戶其幹魯朵在臨潢府陵寢在祖州東南二十里正戶八千蕃漢轉戶七千出騎軍六千

州五錦祖嚴祺銀

縣一富義

提轄司四南京西京奉聖州平州

石烈二曰須速魯

瓦里四曰合不曰撻撒曰慢押曰虎池

抹里四曰臚曰預墩曰鶻突曰糾里闡

得里二曰述壘北曰述壘南

國阿輦斡魯朵太宗置牧國曰國阿輦是爲永興宮初名孤穩斡魯朵以太祖平渤海俘戶東京懷州提轄司及雲州懷仁縣澤州灤河縣等戶置其斡魯朵
在游古河側陵寢在懷州南三十里正戶三千蕃漢轉戶七千出騎軍五千

州四懷黔開來

縣二保和灤河

提轄司四南京西京奉聖州平州

石烈一北女古

瓦里四曰抹曰毋曰合李只曰述壘

抹里十三曰述壘軫曰大隔蔑曰小隔蔑曰毋曰歸化不木曰唐括曰

吐谷曰百爾瓜忒曰合魯不只曰移馬不只曰臚曰清帶曰速穩

聞撒七曰伯德部曰守狝曰穴骨只曰合不頻尼曰虎里狝曰耶律只挾室曰僧隱令公

耶魯盪幹魯朶世宗置興盛曰耶魯盪是爲積慶宮以文獻皇帝衛從及太祖俘戶及雲州提轄司并高宜等州戶置其幹魯朶在土河東陵寢在長寧宮北正戶五千蕃漢轉戶八千出騎軍八千

州三康顯宜

縣一山東

提轄四司

石烈一兮臘

瓦里八曰達撒曰合不曰吸烈曰逼里曰潭馬曰朔不曰耶里直曰耶

魯兀也

抹里十曰紇斯直曰蠻葛曰厥里曰潭馬忒曰出懶曰速忽魯碗曰牒

里得曰闊馬曰迭里特曰女古

蒲速盪幹魯朵應天皇后置興隆曰蒲速盪是爲長寧宮以遼州及海濱縣等戶置其幹魯朵在高州陵寢在龍化州東一百里世宗分屬讓國皇帝宮院正戶七千蕃漢轉戶六千出騎軍五千

州四遼儀坤遼西顯

縣三奉先歸義定霸

提轄司四

石烈一北女古

瓦里六曰潭馬曰合不曰達撒曰慢押曰耶里只曰渾只

抹里十三曰渾得移隣稍瓦只曰合四卑臘因鐵里卑稍只曰奪羅果

只曰拏葛只曰合里只曰婆渾昆母温曰阿魯埃得本曰東廝里門

曰西廝里門曰東鑣里曰西鑣里曰牒得只曰滅母隣母

奪里本幹魯朵穆宗置是爲延昌宮討平曰奪里本以國阿輦幹魯朵戶及阻

卜俘戶中京提轄司南京制置司咸信韓等州戶置其幹魯朵在紉雅里山南